

Primum igitur omnium legatio ad Fædericum est decreta : quem publico nomine rogatum volebant, ut cum Alexandro Pontifice in gratiam vellet redire : facturum eum rem non solum Christiano nomini longe utilissimam, sed Venetis quoque, qui Alexandri commodis ac dignitati consultum vellent, gratissimam. Ferunt Pontificem ipsum, cum Ducem literas ad Fædericum de fide legatis habenda cera obsignantem conspexisset, in Ciani & aliorum gratiam mandasse, ut Ducariæ deinceps literæ plumbo munirentur : quem observationis usum ad hunc diem servari non ignoramus. Obbo (quem, quum codicis unde hæc accepimus vetustate, tum quia omnia quæ eo bello accidere, diligenter perscripsit, tempestate illa fuisse suspicari libet) duplici, ait, Venetos Principes ad eam diem signandi forma usos fuisse, ut publica monumenta plumbo, epistolas ac reliquos libellos cera communirent : sed tum primum Alexandro auctore receptum, ut in his quoque plumbo illi uterentur. Legati ad Fædericum profecti primo congressu satis benigne ab eo accepti : verum ubi de pace cum Alexandro ab eis mentio fieri cæpta est, tum ille ira accensus : *Ite, inquit, & hæc vestro Principi & populo dicite : Fædericum Romanorum Imperatorem ab eis hostem & fugitivum hominem reposcere : quem nisi primo quoque tempore ad se sub custodia vinciam miserint, fore ut pro hostibus Imperii se haberi paulo post Veneti scirent : neque fœdus neque jura ulla gentium plus apud se valitura, quam insignem illam contumeliam, pro qua ulciscenda omnia divina & humana jura paratus esset evertere : admoturum se non multo post terra marique ad eorum urbem copias, futurumque ut victrices aquilas, quod ipsi nunquam putassent, ante Divi Marci ædem sisteret. Cum his legati missi ferocissimas Fæderici minas Venetias attulere. Quibus commota civitas (apparebat enim imminere sibi bellum omnium quæ ad eam diem gessisset, periculosissimum) classem ad retinendum maris imperium continuo decernit : quo defenso, non erat cur infestissimi alioquin hostis vires magnopere timerentur. Dum classis igitur instruitur,*

*Usus plumbi
in munien-
dis literis
unde.*

*Veneti in
gratiam A-
lexandri ad
Fædericum
legatos mit-
tunt.*

*Arma susci-
piunt.*